

佛說孫多耶致經

吳月支優婆塞 支謙 譯

聞如是一時佛在舍衛國行在祇樹給孤獨園除饑甚衆佛爲說經時有梵志名孫多耶致望見佛即住拄杖吐舌念曰吾日三浴噉果飲水不受人施吾行勝沙門行子曹甘食好衣溫褥訛賢非真不如吾道也佛知梵志心之所存告諸沙門曰夫人爲行有二十一惡不得美食好衣志在婬泆志在瞋恚志在愚癡志在睡卧志在疑結謂無應儀志在貢高志在憍慢志在嫉妬志在慳貪志在兇虐無惻隱心志在虛僞内外相違志在不慙内無愧心志在穢行不自羞鄙志在彼惡而不自見志在泆言不歎貞良志在交話譏成二惡志在會鬪不釋兩諍志在無禮自可不謙

志在遂非不受賢諫志在不孝滅慈好逆志好邪道供奉妖蠱家財虛竭令親困窮不覺非常不歸三尊美食好衣從欲奢華以斯二十一惡穢亂其心猶蠱汗垢染之爲色萬無益一懷斯衆惡死入地獄餓鬼畜生其痛難量沙門覩佛明戒棄故自新練情滅欲内外清淨又如淨蠶染即成色爲衆所觀沙門覩明行高智足天下供奉衣食殿舍受之無尤施者福大進行禪定獲溝港頻來不還應儀人亦聞之沙門雖未得道明佛經義執心端正孝順經教弘慈育物潤逮群生怨已安彼視怨若子見女人來待之以妹若覩窮苦當念地獄餓鬼畜生願令群生身安意喜得逢三寶垢除冥滅心淨見明還於本無永康無極志行如斯美食好衣終始無罪群生本性

當八

十一

貪婬瞋恚愚癡嫉妬濁中之濁冥中之冥者沙門心開受明癡垢都寂雖處穢世猶蓮華居夫泥中泥不能汙華受施無罪夫懷三毒十惡不除恣心從欲諂欺求潤不奉佛戒寧吞熱鐵飲烱銅斯死須臾穢濁受施死入太山飲銅食炭其年難計矣梵志前白佛言吾欲去浴有溪名好首夫入中浴者意之穢垢隨水流漂自聞父教言日三浴佛告梵志斯土多溪人入中浴可得獲度苦乎千浴之人可除身垢奈心垢何吾諸沙門斷求念空不願三界心垢寂滅以得淨道汝從何師受法水浴去心垢乎對曰吾父云爾佛言若父得道不對曰不也佛言吾道從心出心端志淨乃得道耳梵志長跪陳白吾向拄杖吐舌但爲狂愚耳今聞佛經心始醒寤猶冥中有燈

火始今有目矣乞爲沙門願佛哀納佛言若有親報之對曰無親佛言沙門來即成沙門已於樹下坐唯二十一事去諸欲念霍然無想即得應儀道起至佛所以頭面著佛足言今盲者得視狂病得愈佛言斯道佳耶汝道佳乎對曰衆道皆邪唯佛道正佛告諸沙門熟唯二十一事道可得矣諸沙門聞經歡喜作禮而退

佛說孫多耶致經